

Concierto Dominical Donny Lacle



Diadomingo 27 september 2015 a tuma luga na The French Steak House di Manchebo Resort & Spa e di 8 Concierto Donny Lacle di e aña aki

Cu hopi duele nos a habri e concierto cu un minuut di silencio na memoria di difunto Herman "Manchi" Hennep, kende a bay laga nos algun dia prome. Pa e motibo aki Coro La Escala cu tabata programa pa presenta e diadomingo ey, a cancela su presentacion como cu Manchi tabata nan dirigente musical y alabes

nan guitarista. A pesar di e tempo cortico pa busca un solucion nos a haya Nel Scholten y Tommy y su Grupo un bes dispuesto pa duna un man. Nel Scholten, un tremendo tocado di steelpan pa mas cu 50 aña a habri e mainta. Nel a cuminsa toca steelpan na edad di 6 aña y a forma parti di Red Stars Steelband di Mario Arends y durante 16 aña a toca cu Aruba Invaders di Edgard Connor y awor aki e ta toca riba su mes. Kemen cu e tin un repertorio enorme riba tur clase di musica, loke

el a demostra tambe poniendo un dushi ambiente den e luga.

Nel a toca pa nos te 11.30 Despues a sigui Tommy y su grupo, un grupo tipico, bou guia di Tommy Figaroa. E grupo tabata consisti diferente musico: Tommy Figaro a toca harpa compaña pa Linda Figaroa, Chonai Farro y e hoben Stephan Flores, cantante; Pedro Figaroa, percusionista; Betto Franken cuarta y otro hoben Justin Flores, conga. Nan a presenta un ora largo,

deleitando nos cu musica crioyo intercambia cu musica Latino Americano, manera: Si mi cama por a papia, Dugudugu, Tog mi sa y mas cantica conoci cu a pone esunnan presente forma coro y balia. Tocando e piesa instrumental "Paraguaya" e musica di harpa a resalta y a zona masha bunita mes. Como cu e grupo tabatin un otro compromisonan a toca te 12.30. Despues e Acuario a pasa rond y tur hende a haci un donacion pa Fundacion Donny Lacle na beneficio di nos hobennan talentoso. Nel Scholten a sigui cu su presentacion ya termina e

programa deleitando nos cu mas piesa bunita riba su steelpan, manera: Na mi un chens, All my loving, Bésame mucho, Chinita, Because of who you are, demostrando asina su tremendo talento riba steelpan. Un danki di curason ta bay tanto pa Tommy y su grupo como pa Nel Scholten pa nan cooperacion fantastico cu a haci posibel cu a pesar di tur contratiempo nos concierto por a sigui y nos bishitantenan por a disfruta di un dushi mainta. Nos siguiente concierto lo tuma luga diadomingo dia 25 di october proximo. □